

文山集

文

山

水

宋丞相文山先生全集卷之十四

萬壽堂

集杜詩

自序

余坐幽燕獄中無所爲誦杜詩稍習諸所感興因其五言
集爲絕句久之得二百首凡吾意所欲言者子美先爲代
言之日玩之不置但覺爲吾詩忘其爲子美詩也乃知子
美非能自爲詩詩句自是人情性中語煩子美道耳子美
於吾隔數百年而其言語爲吾用非情性同哉昔人評杜
詩爲詩史蓋其以詠歌之辭寓紀載之實而抑揚褒貶之
意燦然於其中雖謂之史可也予所集杜詩自余顛沛以

來世變人事槩見於此矣是非有意於爲詩者也後之良
史尚庶幾有攷焉歲上章執徐月祝犁單閼日上章協洽
文天祥履善甫叙

是編作於前年不自意流落餘生至今不得死也斯文
固存天將誰屬嗚呼非千載心不足以語此壬午止月
元日文天祥書

社稷第一

三百年宗廟社稷爲賈似道一人所破壞哀哉

南極連銅柱

送李晉肅入蜀

煌煌太宗業

北司

始謀誰其間

苦熟主陽中丞

風雨秋一葉

故李光弼司

理宗度宗第二

先帝弓劔遠

送譚二判官

永懷侍芳茵

送汝南郡王

今朝漢社稷

喜達行在所

為話涕沾巾

送司馬入京

誤國權臣第三

似道喪邦之政不一而足其羈虜使開邊釁則兵連禍

結之始也哀哉

蒼生倚大臣

送韋中丞之晉

北風破南極

北風

開邊一何多

前出塞

至死難塞責

吳侍御江上宅

瀘州大將第四

西南失大將

客居

帶甲滿天地

送遠

高山憂禍胎

山寺

感歎亦歔歔

羌村

襄陽第五

十年殺氣盛

北風

百萬攻一城

遺懷

賊臣表逆節

往在

胡騎忽縱橫

嚴公武

荆湖諸戍第六

長嘯下荆門

春日梓州登樓

湖行速如鬼

寒廬子

門戶無人持

水檻

社稷堪流涕

西閣呈元二
十二

黃州第七

始謂虜以襄陽船自漢入江後乃知虜之未渡蘄黃已

先降故其渡也襄漢蘄黃之船皆在焉

桓桓陳將軍

北征

化作虎與豹

夏日歎

陽羅堡第八

夏貴自陽羅堡之敗順流而下沿江南岸縱兵放火歸
廬州解甲當是時其心已無國矣似道建督至江上夏
貴不得已出見斬以纛鼓東南再造之機也失此不圖

社稷為墟哀哉

日色隱孤戍

發秦州

朝廷任猛將

又上後園

京湖宣闕第九

東屯大江北

行宮張望

楚星南天黑

晚登灤上堂

大江聲怒號

大雨

宿昔恨滔滔

送王砵使南海

開慶已未江陵閩帥自上而下奔救鄂渚令朱禩孫任
宣閩乃自鄂渚走還岳陽朱與夏通任長江之責一上
而一下使中流蕩然虜安行人無人之境國安得東立
嗚呼痛哉

正當艱難時

送樊侍御漢中

豈無濟時策

遣興

連檣荊州船

雨

悠悠回赤壁

過南岳入洞庭

渡江第十

常時江水風波不可狎視虜渡江時水乃鏡平豈非天
哉

江元自闊

行次古戎泛江

輕船下吳會

逢劉漢弟

南紀收波瀾

衡州縣呈陸宰

吾將罪真宰

劍門

鄂州第十一

先時李雷奮為郡守十月以臺論罷至是無正官張宴
然以城降金湯重鎮正風寒中而去王守當國者獨何

心哉

鄂渚分雲樹

過南岳入洞庭

春城帶雨長

入行軍六第

惜哉形勝地

懷鎮水居

河岳空金湯

入衡州

江州第十二

戎馬暗天宇

送魏六文交廣

落日九江流

送李功曹荆

元惡迷是似

入衡州

化作長黃虬

奉同郭給事

安慶府十三

岸轉異江湖

過南岳入洞庭

江水流城郭

春日梓州登樓

鷓鴣志意滿

病相

山鬼獨一脚

懷台州鄭戶

魯港之遁第十四

已未鄂渚之戰何勇也魯港之遁何衰也人心已去國
事瓦解當是時惟豪傑拔起首禍之權奸無救禍之理

哀哉

出師亦多門

後出塞

水陸迷畏途

贈鄭十八賁

躑躅麒麟老

贈射洪李四丈

危檣逐夜烏

過南岳入洞庭

建康府第十五

亭亭鳳凰臺

鳳凰臺

江城孤照日

登牛頭山亭

胡來滿彤宮

往在

驅馬一萬匹

北征

相陳宜中第十六

魯港敗後陳宜中當國首斬殿帥韓震脅遷之議差強

人意宜中實無經綸至秋託故遁歸及不得已十月再

來則國事去矣哀哉

蒼生起謝安

宴王使君宅

翠華擁吳岳

北遊

可以一木支

水檻

俯恐坤軸弱

青陽峽

召張世傑第十七

京師內空賴張世傑一軍自荆湖至

詔發西山將

送郭中丞

熊虎亘阡陌

贈王思禮司空

笳鼓疑皇情

贈左僕射嚴武

佳氣向金闕

北征

鎮江之戰第十八

張世傑率舟師趨金山約殿帥張彥自常州陸出京口

揚州兵出瓜州三路交進同日用事既而揚州失期先

出取敗常州竟不出世傑多海舟無風不能動江水平

虜以水哨馬往來如飛遂以潰敗嗚呼豈非天哉

海潮舶千艘

送王師使南海

肉食三十萬

昔遊

江平不肯流

陪王使君泛江

到今有遺恨

北遊

將相棄國第十九

丙子正月十八日虜至高亭山是夜四鼓宣中逃翌日

世傑逃

扈聖登黃閣 贈嚴八閣老

大將赴朝廷 草堂

胡為入雲霧 次高司直閬州

浩蕩乘滄溟 橋陵韻呈縣官

京城第二十

當宁陷玉座 往在

兩宮棄紫薇 誅懷

北城悲笳發 夏夜歎

失涕萬人揮 送盧十四弟

京城二十一

黃屋朔風卷 故秘監蘇源明

園林殺氣平 送郭中丞大僕

宮殿青門隔 送賈閣老出汝

未懷丹鳳城 送覃二判官

陵寢第二十二

五陵花滿眼

別何筼

霜露在草根

潤州東樓

冥冥子規叫

法鏡寺

重是古帝魂

杜鵑

陵寢第二十三

旄頭彗紫微

衡州縣呈陸守

蚩尤塞寒空

奉先縣冰懷

愚智心盡死

聽何氏歌

漂蕩隨高風

建興

江陵第二十四

高達京湖名將已未解圍鄂州賈似道許以建節竟不

與而移以與呂文德達怨望久矣至是為京湖制置以

城降宣聞不能制城初陷朱禩孫仰藥不得死既而亦

降焉

聞說江陵府

陝溢

今又降元戎

客居

甲外控鳴鏑

贈王司空思禮

肩輿強老翁

王十五前閣會

淮西帥第二十五

夏貴既失長江惟恐督府有成無所逃罪又恐孫處

以後進為將有功總統出已上日夜幸其敗覆督府既

潰歸廬州竟不出朝廷屢詔勤王若罔聞知國亡及必

淮西全境獻北為已功焉於是貴年八十餘矣老而不

死是為賊其貴之謂歟

借問大將誰

後山塞

戰骨當速朽

前出塞

逆節同所歸

諫懷

水花笑白首

送王休使南

揚州第二十六

李庭芝在揚州十餘年畏怯無遠謀惟閉門自守無救
於國及景炎登極以為首相乃引兵輕出渡海南歸朱
煥尋以城獻虜哀哉

城峻隨天壁

自帝城

胡來但自守

潼關吏

士卒終倒戟

贈王司空思禮

仰望嗟嘆久

九成宮

京湖兩淮第二十七

東南兵力盡在江北金城湯池國之根本高以荊州降
夏以淮西降李死淮東盡失無復中原之望哀哉

荆揚風土暖 秋行官張望

大城鐵不如 潼關吏

泰山忽破碎 登慈恩塔

流落隨丘墟 五盤

景炎擁立第一十八

予自蘇州歸闕建議出二王於閩廣及虜至二王方出
宮蘇劉義陸秀夫遇二王於温時陳宜中海船泊清嶼
門諸人往邀之共圖興復益王始建元帥及張世傑自
定海至同趨三山以五月一日益王登極改元景炎

漢運初中興 述懷

扶顛待柱石 入衡州

疇能補天漏 寄岑參

登階捧玉冊 往在

福安府第二十九

崔嵬扶桑日

幽人

闊會滄海潮

枯柏渡

傾都看黃屋

送班司馬入京

此意竟蕭條

贈常左丞

幸海道第三十

自三山登極世傑遣兵戰邵武大捷人心翕然世傑不
為守國計即治海船識者於是知其陋矣至冬聞警即
浮海南去天下事是以不可復為哀哉

天王守大白

九成宮

立國自有疆

前尚塞

舍此復何之

後遊脩覺寺

已具浮海航

壯遊

景炎賓天第三十一

御舟離三山至惠州之甲子門駐馬已而遷宮富場丁

丑冬虜舟來移次仙澳與戰得利尋望南去止礪川景
炎賓天盖戊寅四月望日也嗚呼痛哉

陰風西北來

北征

青海天軒輕

送從弟亞

白水暮東流

新安吏

龜斷蒼梧帝

贈秘書監本才

祥興登極第三十二

戊寅四月十七日衛王登極於礪川

浮龍倚長津

別蔡十四著作

參錯走洲渚

入衡州

蒼梧雲正愁

登慈恩塔

初日翳復吐

法鏡寺

祥興第三十三

六月世傑自礪川北還至崖山止焉崖山乃海中之山

兩山相對延袤中一衣帶水山口如門世傑以為形勝
安之

南遊炎海甸

送魏六丈

沃野開天庭

橋陵韻呈縣

真龍竟寂寞

雷

乾坤水上萍

衡州送李大夫

祥興第三十四

已卯正月十三日虜舟直造厓山世傑不守山門作一字陣以待之虜入山門作長蛇陣對之二月六日虜乘潮進攻半日而破死溺者數萬人哀哉

孤矢暗江海

草堂

百萬化為魚

潼關史

十留遺恨

過南岳入洞庭

故園莽丘墟

述事

祥興第三十五

世傑於戰敗後乘霧雨晦冥以數舟遁去

朱厓雲日高

遣過

風浪無晨暮

懷台州鄭司

冥冥翠龍駕

雨

今復在何許

宿清溪驛

祥興第三十六

初行朝有船千餘艘內大船極多張元帥大小船五百而二百舟失道久而不至北人乍登舟嘔暈執弓矢不支持又水道生疎舟工進退失據使虜初至行朝乘其未集擊之蔑不勝矣行朝依山作一字陣幫縛不可復動於是不可攻人而專受攻矣先是行朝以游舟數

出得小捷他船皆闕浙水手其心莫不欲南向若南船
摧鋒直前闕浙水手在北舟中必爲變則有盡殲之理
惜世傑不知合變專守法嗚呼豈非天哉

六龍忽蹉跎

別唐十五誠

川廣不可泝

送汝陽王璣

東風吹春水

送程錄事

乾坤莽回互

懷台州鄭司戶

祥興第三十七

幽燕盛用武

昔遊

六合已一家

後出塞

眼穿當落日

喜達行在

滄海有靈查

喜晴

祥興第三十八

從南溟來

客從

黃屋今在否

謝別張侯

天高無消息 幽人

未忍即開口 述懷

祥興第三十九

南嶽配朱鳥 望北

地軸為之翻 晦日尋崔駰

皇綱未為絕 北征

雲臺誰再論 覽伯中丞宮

陳宜中第四十

之
丁丑冬御舟自謝女峽歸礪川陳宜中船相失莫知所

管墓本時須 別張十三
經中興業 述古

有志乘鯨鰲 送王
贈李光弼

張世傑第

文山全集
世傑得士卒二
實賴其力然其
喪敗哀哉

南國卷雲水

舟中苦熱

覺金復有無

遣懷

蛟龍亦狼狽

溪漲

反復乃須臾

草堂

張世傑第四十二

長風駕高浪

龍門

偃蹇龍虎姿

病柏

蕭條猶在否

止水遣懷

寒日出霧遲

早發射洪

蘇劉義第四十三

蘇京湖老將
雖出呂氏乃心
專在王室永嘉
推戴實建

大功後世傑用事志鬱鬱不得展其人剛躁不可近然
能服義終始不失大節匡山與其子俱得脫亦不知所
終

驊騮事天子

送高司直

龍怒拔老湫

送韋十六評事

鼓柂視青旻

寄薛三郎中

烈風無時休

登慈恩塔

曾淵子第四十四

曾淵子元貶雷州御舟南巡復與政事匡山之敗曾欲
赴水爲蘇父子所留同得脫其家竟沒虜後還五羊有
人見其子雷郎者焉哀哉

子負經濟才

別唐十五

鬱陶抱長策

始華陽呂少府

安得萬里風

夏夜歎

南園回羽翮

送嚴公入朝

汪丞相萬里第四十五

先生居饒州虜入城先生投府第中池水死其弟萬頃

於廳事上被執殺死哀哉

星折台衡地

送蘇州李長史

斯文去矣休

送王信州

湖光與天遠

過洞庭

屈注滄江流

奉同郭給事

趙倅昂發第四十六

虜至池州倅昂發蜀人夫婦日經死

風雷颯萬里

大雨

大江動我前

水會渡

青衿一憔悴

衡州縣志

名與日月懸

陳拾遺故宅

將軍王安節第四十七

常州敗虜生獲王安節不屈而死虜謂過江以來武人忠義者惟王安節一人安節乃節度使王堅子也

激烈傷雄才

金華山觀

直氣橫乾坤

別李義

惆悵汗血駒

別張建封

見此忠孝門

柏中丞降官制

李安撫芾第四十八

肯齋先生蜀人寓居衡陽乙亥留夢炎為潭帥夢炎歸相始起先生為代先生倉卒運掉城守甚備及城陷先生殺其家人乃自焚死哀哉

殺氣吹沅湘

入衡州

高興激荆衡

李八判官

城中賢府主

課伐木

千秋萬歲名

夢李白

李制置庭芝第四十九

庭芝得爰立之命引兵至泰州為虜所困泰州孫九賣
城庭芝被執誅於楊州市雖無功於國一死為不負國
矣

空留玉帳衛

送嚴公

那免白頭翁

陪章留後

死者長已矣

石壕吏

淮海生清風

送高司直

姜都統才第五十

淮東猛將揚州前後主戰皆其人也及泰州破被執虜
愛其才勇啖以官爵不肯降罵諸負國者臨刑含血以

噴罵虜不絕口其英風義烈淮人言之無不傷歎惜哉

屹然強寇敵 贈王司寇

古人重守邊 後出塞

惜哉功名忤 薛大保

死亦垂千年 義鶻

張制置珪第五十一

蜀之健將元與咎萬壽齊名咎降張獨不降行朝擢授制閫未知得拜命否蜀雖糜碎珪竟不降為左右所賣

珪覺而逃遁被囚鎖入北不肯屈後不知如何

氣敵萬人將 楊監書鷹

獨在天一隅 遺懷

向使國不亡 九成宮

功業竟何如 別張建封

陸樞密秀夫第五十二

字君實文筆英妙自維揚幕入朝京師陷永嘉推戴有力及駐厓山蕪宰相凡朝廷事皆秀夫潤色綱紀之厓山陷與全家赴水死哀哉

文彩珊瑚鈎

奉同郭給事

淑氣含公鼎

張九齡

炯炯一心在

嚴武

天水相與求

漢陝西南臺

勤王第五十三

甲戌冬詔天下勤王予守章貢首應詔意同志者當接踵而奮已而竟無應者予遂以孤軍赴闕世事不濟殆由於此哀哉

出師亘長雲

後出師

盡驅詣闕下

往在

首唱仄大義

衡州縣學

垂之俟來者

蘇源明

蘇州第五十四

予領兵赴闕時陳宜中歸未嘉留丞相夢炎當國夢炎
意不相樂出予以制闡守吳門尋以獨松事急陳丞相
留丞相陳樞密文龍連書趣還宿衛予不得已行未幾
姑蘇陷哀哉

嵯峨閭門北

北遊

朱旗散廣川

饒表二端

控帶莽悠悠

送韋十六評事

慘淡陵風煙

草堂

拜相第五十五

予自吳門還遣守獨松戍餘杭丙子正月初二日除知

臨安府辭不拜引輕兵至闕陳大義不得見十八夜宜
中逃次日早予除樞密使午拜丞相樞密使都督諸路
軍馬然事已無及無可柰何矣予不敢當亡國之名請
有危難捐軀而已

我來屬時危

九戎宮

朝野色枯槁

送長孫待御

倚君金華省

張九齡

不在相逢早

贈射洪李四丈

出使第五十六

初宜中蒙蔽外庭如遣使北軍求議和約見伯顏於長
安堰已而不如約故虜征至高亭山要以相見宜中遂
逃上下皆莫知其詳予既辭相印不拜遂奉上命以議

和爲名在虜營虜強以降余見伯顏開陳大義詞氣慷慨虜頗傾動尋留不遣而丞相吳堅右丞賈餘慶同知樞密院謝堂以下竟自納款余責伯顏留使失信及數虜罪惡以死自誓而一無所及矣痛哉

隔河見胡騎

前出塞

朝進東門營

後出塞

皇皇使臣體

寄崔部事

詞氣浩縱橫

春陵行

發京師第五十七

自國都失守應降表及行下省札播告歸附皆不敢使余聞知予居虜中欲求速死虜衛守甚嚴務爲塗塞耳日二月八日大臣吳堅賈餘慶家鉉翁劉岳皆以祈請

使爲名下船詣北庭虜忽驅余並行余不肯往被其掣
迫不得已行至謝村幾逃去

東下姑蘇臺

壯遊

揮涕戀行在

北征

蒼茫雲霧浮

發秦州

風帆倚翠蓋

幽人

去鎮江第五十八

余至京口北行有日矣余欲引決同行士杜濬曰且逃
逃不獲死未晚也遂謀走真州時江中皆北船偶物色
一空船在虜籍外捐重貲約之二月晦日夕一更後予
約同行十一人潛出邸挾刃自隨不濟則自殺幸而安
行無虞遂泝流而上虜船綿亘江上幾不得出三月朔

抵真州今而後喜可知也

京口渡江航

送許八拾遺

窮途仗神道

送魏六丈

蕭條向水陸

入衡州

雲雨白浩浩

送長孫侍御

至真州第五十九

余至真州登城四望徘徊感歎守苗再成慷慨有志畧

聞余言踴躍思奮余即作書報制闡李庭芝及約淮西

夏貴又作諸州太守書約以興復苗守遣人四出導意

兩日久與余講進取方畧使天命再宋是行也中興之

機也一人孤疑事乃大繆惜哉

萬里長江邊

送高司直

去國同王粲

蓬泉驛

青山意不盡

上牛頭寺

皇天照嗟嘆

舟中苦熱

行淮東第六十

李庭芝聞余至真州以爲來說城遣使數十輩來涖殺
予苗再成不肯然不得不出予以自白以上巳日給余
出城門閉城不荅余欲赴濠死朱幾苗遣五十人送行
行五十里布刃於野詰問甚久使一語可疑卽爲草間
血矣其人信余言爲之歎惋送至州境夜至揚州西門
欲扣城入前却數四四人逃去余與七人走荒野空屋
中是日虜萬騎自屋後過幸而苟免自是變姓名趨高
郵初五夜行屢迷失道旦虜哨各鳥獸竄伏縛去一人

殺傷一人又幸喜脫余時日夜在死亡中驚喘危懼飢
餓無聊人生逆境有如此者哀哉

客子中夜發

赴奉先縣

月照白水山

彭衙行

悲辛但狂願

懷鄭十八戶處

浩蕩前後間

清溪

自淮歸浙東第六十一

余高郵道中遇哨得脫行數十里匍匐不能行幸遇村
夫雇倩籬擡入郡又有被傷者扶持強行血衣淋漓見
者傷惜初七日至郡地分官盤詰甚至稱制置司有報
文丞相來說城合一路覺察不納南來人余等既變姓
名地分官見有傷者不疑聽下船去沿途歷盡艱險得

至秦州城下伏十餘日趨通州自下船後哨騎或隔五
里或隔十里驚惶連日達通州城反覆詰問數日不納
不得已從地分官吐實語太守楊思復遂得覆護主圍
子內大舟中然後以海舟送歸浙東船中遇風波屢覆
又遇賊追逼數四是行寄一生於萬死不復望見天日
至永嘉惟存六人

北走驚險難

彭衙行

十步一回首

相從歌

碧海吹衣裳

又上後園山脚

掛席上南斗

別張使君

至福安第六十二

益王以天下兵馬都元帥衛王以副元帥建號於永嘉

隨趨三山開府予四月八日到永嘉則元帥舟去已一月矣亟使副守李珪驛報行府陳丞相即遣人來議擁立事余深贊大議五月一日登極予以觀文殿學士侍讀召赴行在二十六日至行都即再相然國方草創陳宜中尸其事專制於張世傑余名宰相徒取充位遂不敢拜議出督

握節漢臣回

鄭駙馬

麻鞋見天子

述懷

感激動四極

嚴武

壯士淚如雨

聽楊氏歌

福安宰相第六十三

余至通州地分官以制置司文移爲說甚作難阻余不

得已吐實以通楊帥守思復乃云謀報許浦有馬根尋
文丞相甚信余言不直制司予然後得楊守存恤遂遵
南歸及過明州東門有列岸數百艘初不知爲虜把隘
船也後問之東門道士云是日虜頭目見船過問左右
曰此何船皆以漁舟對遂得善去嗚呼危哉楊守爲余
言欲得海船數百艘當約許帥文德擁兵勤王慨然有
誓清之志予至永嘉卽詳報陳丞相不以爲信乃遣毛
浚之通州而不以告余浚至通州守問予何以無書遂
發怒浚幾不免浚出而通遂降虜矣惜哉

然喪亂際

精中允制

反覆歸聖朝

鄭友

秉鈞孰爲偶

贈李八判官

扶顛永蕭條

李光弼

南劔州督第六十四

始余至末嘉留一月候命末嘉及台處豪傑皆來自獻
願從海道作戰守規模予至福安欲還末嘉謀進取廟
謨不以爲然遂議開督于廣廣陷乃出南劔開府聚兵
賊爲收復江西計于時幕府選辟皆一時名士宜中旣
棄臨安及三山登極欲倚世傑復浙東西以自洗濯所
以阻予末嘉之行後取定海兵敗李珣爲制閩衆方思
用予悔已不及惜哉

劔外春天遠

送班司馬入京

江閣鄰石面

蔣巖雲

文山全集
卷之四
幕府盛才賢

次古城店

意氣今誰見

白馬

汀州第六十五

予在劔朝廷嚴趣之汀十月行十一月至汀州而福安
隨陷車駕幸海道矣事會之不齊如此哀哉

雷霆走精銳

送樊侍御

斧鉞下青冥

送李大夫

江城今夜客

出郭

慘淡飛雲汀

薛判官

梅州第六十六

予至汀汀守可疑汀兵非素所拊循寇兵自贛自劔交

至丁丑正月行府遂引兵趨漳州龍巖謀入衛漳潮道

阻三月入梅州時麾下頗不循法斬二都統軍政一新

焉

樓角凌風迥

東樓

孤城隱霧深

野望

萬事隨轉燭

佳人

秋光近青岑

伐木

贛州第六十七

五月引兵自梅出嶺時贛吉兵皆來會六月大捷於雩

都進攻興國縣縣返正於是駐屯遣大兵攻贛州又以

偏師出吉州贛諸縣皆復虜號令惟行於城中吉水未

豐萬安未新龍泉以次皆復臨洪袁瑞莫不響應詣軍

門請約束者相繼興國黃州新復皆來請命汀州有偽

天子黃從斬首至府上下翁合氣勢甚盛天若祚宋則

是舉也幸而一捷國事垂成之候也

崆峒殺氣黑

壯遊

灑血暗郊塙

薛判官

哀笳曉幽咽

留花門

石壁斷空青

西閣

江西第六十八

行府偏師出吉州者戰于鐘步不利攻贛兵不幸相繼
而敗行府孤立時處置安撫鄒瀾聚兵數萬在末豐境
行府引兵就之會其軍亦潰而虜自後追及不可支雖
人謀之不滅殆天意之未順每一念此氣殫欲絕哀哉

東望西江水

第觀

高義在雲臺

建封

到今用鉞地

草堂

霜鴻有餘哀

金華山

江西第六十九

旌頭初傲擾 將適江陵

乾坤空崢嶸 畫鶴

義士皆痛憤 草堂

嚮者留遺恨 空天岸

復入廣第七十

行府敗於江西收散兵復入汀尋出會昌入安遠趨循
州是冬屯南嶺戊寅二月出惠州海豐縣駐於麗江涌
徧遣間使沿海訪問車駕六月翠華至厓山行府移船
澳八月進少保信國公職任依舊行府欲赴關張世傑
阻隔於中不果行

東浮滄海漚 薛郎中

南為祝融客 詠懷

漂轉混泥沙

柴門

迫此短景急

龍門

駐惠境第七十一

朱鳳日威垂

北風

羅浮展衰步

詠懷

北風吹籬葭

秋行官張望

送此齒髮暮

雨

駐潮陽第七十二

十月引兵趨潮陽稍平群盜人心翕然

寒城朝煙淡

吳侍御宅

江沫擁春沙

遠遊

群盜亂射虎

雷

回首白日斜

喜晴

同府之敗第七十二

十一月謀報虜大衆至漳泉度勢不敵移屯將趨海豐

為虜騎追及於中道時行已數日不為備倉卒潰散遂被執

送兵五千人北征

散足盡兩靡種蒿苳

留滯一老翁刑

蓋棺事則已奉先縣

行府之敗第七十四

自國難後行府白手起兵展轉患難東南跋涉萬餘里
事不幸不濟然臣子盡心焉爾矣成敗天也獨柰何哉

翠蓋蒙塵飛誅懷

仗鉞奮忠烈北征

千秋滄海南張九齡

事與雲水白王思禮

南海第七十五

余被執後即服腦子約二兩昏眩久之竟不能死及至

張元帥所衆脅之跪拜誓死不屈張遂以客禮見尋置
 海船中守護甚謹至厓山令作書招張世傑手寫詩一
 首復命末句云人生自古誰無死留取聲名照汗青張
 不強而止厓山之敗親所目擊痛苦酷罰無以勝堪時
 日夕謀蹈海而防閑不可出矣失此一死困苦至於今

日可勝恨哉

開帆駕洪濤

遣遇

血戰乾坤赤

送李判官

風雨聞號呼

草堂

流涕灑丹極

別蔡著作

南海第七十六

南海奉天外

送程功曹

祇應學水仙

舟中

自傷遲暮眼寓日

為我一潸然李使君

至廣州第七十七

自匡山至五羊壯哉郡真形勝之國也往年虜平其城
收復後不能完整為守國計哀哉吾國之無人乎

南方瘴癘地雷

白馬東北來日馬

城掃遺堞李弼

淚落強徘徊鄭陌馬樓臺

至南安軍第七十八

予四月二十二日離五羊五月四日出梅嶺至南安軍
鑰置舟中予不食擬至廬陵得暝目庶幾首丘之義云

短日行梅嶺哭李常侍

天門鬱嵯峨別唐誠

江西萬里船 春夜留宴

歸期無柰何 何將軍山林

過章貢第七十九

崆峒地無軸 近從弟亞

江山雲霧昏 別李茂

萍漂忍流涕 入行軍六第宅

故里但空存 後出塞

至吉州第八十

掛颿遠色外 雨

緬邈懷舊丘 破船

江水風蕭蕭 枯柁渡

烏啼滿城頭 發秦州

吉州第八十一

泊舟滄江岸 課代本

身輕一鳥過 送蔡師魯

請為父老歌 弟村

歌長擊樽破 屏跡

古州第八十二

戚戚去故里

前出塞

我生苦飄零

通泉驛

回身視綠野

送李校書

但見西嶺青

楊旌

過臨江第八十三

自離南安軍五日而至廬陵七日過臨江八日至豐城
余雖不食未見其殆衆以飲食交相逼迫予念既過鄉
州已失初望委命荒濱立節不白且聞暫止金陵鄰出
坎之會或者有隕自天未可知也遂復飲食勉徇衆情
初衆議以予漸殆欲行無禮掩鼻以灌粥酪至是遂止
乃知夷齊之心事由其獨處荒山故得行其志耳

獨帆如飛鳴

贈蘇溪

清江轉山急

早發射洪

回首白雲多

何將軍山林

山寒夜中泣

龍門鎮

過隆興第八十四

隆興自陷沒後忠義奮起幾於返正屠滅殆盡過而傷之

臨江久徘徊

山寺

再讀徐孺碑

張九齡

交遊颯向盡

餞裴二端公

到今耆舊悲

疋橋

江行第八十五

畏途隨長江

白沙渡

萬里滄茫水

憶鄭南垞

遊子去日長

成都

壯心不肯已

戲贈友

江行第八十六

江水東流去 陪王侍御宴

浮雲終日行 夢李白

別離經死地 鄭州馬池

飲啄愧殘生 草堂

江行第八十七

蕭蕭白揚路 李益

死人積如丘 遣興

大江東流去 成都

蒼山旌旆愁 帝評事

江行第八十八

連山暗烽燧 送從弟亞

川谷血橫流 送樊侍御

揮泪臨大江 送常諷

上有行雲愁 遣興

江行第八十九

六月六日過隆興十二日至金陵囚邸八月二十三

渡江北行事會多有可慨尚何言哉

朔風飄胡鴈

遣興

江城帶素月

聽楊氏歌

安得覆八溟

客居

滂泥洗吳越

喜雨

北行第九十

八月二十六日至揚州九月初一日哭母小祥於邳門

外初九日至徐州弔項羽故宮地登黃樓臺讀子由賦

十二日至沛縣縣有歌風臺十五日至東平府十七日

至高唐州十八日過平原二十日至河間府二十一日

至保定府

浮雲暮南征

前出塞

我馬向叱嘶

白沙渡

荆棘暗長原 園官送菜

子規晝夜啼 客居

北行第九十一

清秋望不極 野望

中原杳茫茫 成都

游子悵寂寥 枯柏渡

下馬古戰場 遺興

北行第九十二

浮雲連海岱 兗州城樓

寒蕪際碣石 昔遊

落景惜登臨 杜侍御江樓

人煙渺蕭瑟 北征

北行第九十三

平野入青徐 兗州城樓

桑柘葉如雨 昔遊

信美無所適 成都

沉思情延佇 雨

北行第九十四

乾坤幾反覆

蘇時御渙

乘凌惜俄頃

漢波西南臺

懷古視平蕪

遣懷

令人發深省

奉先寺

北行第九十五

游子無根株

贈李四文

世梗悲路澀

送程錄事

關山雪邊看

秋行官張望

愁思胡笳夕

喜達行在所

至燕城第九十六

十月一日至燕城越五日送千戶所枷禁十一月初一

日蘇枷初九日領赴北庭引問余不跪抗詞不屈尋復

還獄待死以至今日云

往在西京時 往在

胡星墜燕地 別唐誠

登臨意惘然 登惠義

千秋一拭淚 酌薛判官

至燕城第九十七

浩蕩想幽冀 夏口歎

行行郡國遙 野望

天寒落萬里 遣興

回首向風颺

至燕城第九十八

百年不敢料 龍門閣

先後無醜好 遣興

絕境與誰同 送裴二

飄泊南庭老 舟中

入獄第九十九

陰房鬼火青 玉華宮

白日亦寂寞 昔遊

自非曠士懷

登慈恩塔

居人莽牢落

送樊侍御

入獄第一百

大黑閉春院

大雲寺

今如置中兔

懷鄭司戶

人間夜寥閨

夜聽許十諷詩

永日不可暮

夏夜歎

入獄第一百一

行行見羈束

寫懷

斯人獨憔悴

夢李白

欲覺聞晨鍾

遊奉先寺

青燈死分翳

宿鑿石蒲

入獄第一百二

勞生共乾坤

寫懷

何時有終極

別贊上人

燈影照無暈

大雲寺

今夕復何夕

贈衛公處士

入獄第一百三

眼前列柵械

草堂

熊掛玄蛇吼

上水遠喚

夜看豐城氣

詠懷

朝光入甕牖

晚月

入獄第一百四

徘徊虎穴上

寄贊上人

吾道正羈束

觀水漲

落日將何如

宴歷下亭

清文動泉玉

別薛判官

懷舊第一百五

自百五至百九皆懷念故人為王事而沒者固多不能

盡紀嗚呼哀哉自百二十六至百三十八皆師友之際

同列之情死生契闊不能自已也

文山全集
風塵淹白日

寄第五弟

乾坤霾漲海

將適江陵

為我問故人

送高司直

離別今誰在

懷灞上遊

懷舊第一百六

天寒昏無日

石龕

故鄉不可思

赤思

訪舊半為鬼

贈南處士

慘慘中腸悲

送方書記

懷舊第一百七

故園花自發

憶弟

無復故人來

昔遊

亂離朋友盡

遣懷

幽珮為誰哀

雨

懷舊第一百八

故人入我夢

夢李白

相視涕闌干

彭衙行

四海一塗炭

逃難

馬川身獨完

垂老別

懷舊第一百九

中夜懷友朋

宿清溪驛

百年見存沒

鄭公處

風吹蒼江樹

雨

寒月照白骨

北征

金應第一百一十

承信郎路分金應元備筆札使令性剛知義隨勤王入

京余陷虜左右星散惟應無叛去志在鎮江得同脫狼

狽淮東備嘗艱苦至通州以憂鬱病死葬城下哀哉

追隨三十載

送頌文學

艱難愧深情

卷村

何處埋爾骨

鹿頭山

呼號傍孤城

懷鄭司戶

張雲第一百一十一

路鈴張雲元吉州敢勇將官隨閩勤王余既陷虜張雲
引兵自婺建劔汀歸里虜已據吉城雲不勝憤七月引
所部襲虜於南柵門擊殺甚衆本為散退之計會天明
戰渴赴江飲水尋被衝溺死使能少忍當為吾用哀哉

痛憤寄所宣

義鵬

四方服勇決

北征

壯士歛精魂

客石

里巷猶嗚咽

赴奉先縣

劉欽貢元第一百一十二

守敬德吉州貢士素有志氣好功名上下今古徒於議

論余開府汀城敬德來寧都就招諭使鄒淵會虜暴至

竟死亂兵中同時死者鞠華叔頽斯立頽起巖皆郡之
英俊能為時立事功者天生人才若此曾未施一技速
折乃爾哀哉

文章日自負

蘇公源明

去家死路傍

上後園山脚

高視見霸王

鉞門

感子故意長

贈衛處士

呂武第一百一十三

環衛官呂武太平人面旗為軍余陷虜應募隨從北行
其人勁烈面折人觸忌諱不避然忠鯁人皆服之余與
同脫鎮江行淮東患難中賴以自壯及開府南劍遣其
結約江淮道尋阻武間關數千里即余於汀梅挺身寇

寨化賊爲兵方將將數千人出江西以無禮於士大夫
遭橫逆死死之日一軍爲流涕哀哉

疾惡懷剛腸

壯遊

世人皆欲殺

不見

魂魄猶正直

南池

回首肺肝熱

鐵堂

鞏宣使信第一百一十四

團練使都統招諭使鞏信荆湖老將沉勇有謀奉朝命
引所部隨府予自興國趨永豐虜追在後於東固方石
嶺下大戰信據險堅立不動中數箭死土人葬之如生
尋奏贈清遠軍承宣使立廟戰所而迄未有以慰忠魂
也哀哉

壯士血相視

嚴公武

斯人已云亡

楊監草書圖

哀哀失木狔

吳侍郎江上宅

夜深經戰場

北銜

張秘撰汴第一百一十五

秘閣修撰廣東提舉督府參謀張汴蜀人嘗為三吳客
佐荆湖幕習兵事予自贛勤王汴即入幕開督後領袖
一府知無不為空坑之敗秘撰易軍士皂衣伏草中死
亂兵後鄒處置得其尸棺歛焉哀哉

入幕旌旗動

別魏侍郎

揮翰綺綉場

汝陽土璣

煙霧蒙玉質

赴奉先縣

斯人今則亡

遺興

繆朝宗第一百一十六

環衛官知梅州繆朝宗淮人有意氣嘗為常熟邠氏客
從余於平江予歸福安自婺間道來相從精練幹實孜
孜奉公軍府器械悉出其手空坑之敗自經於山間哀
哉

空荒咆熊羆

課伐木

摧殘沒藜莠

枯棲

平生江海心

破船

其人骨已朽

喜晴

閩三士第一百一十七

督機秘書謝杞督幹架閣許由督幹架閣李幼節閩士
之秀皆登科杞太學名士空坑之敗不知所終哀哉

俊逸鮑參軍

憶李白

優游謝康樂

石櫃

豺虎正縱橫

久客

南行道彌惡

青陽陝

諸幕客第一百一十八

督府架閣吳文煥督遣林棟等皆閩士有幹實宣勞幕
府空坑之敗被執尋遇害哀哉

入幕未展才

贈李八判官

辛苦在道路

送高司直

回首一茫茫

送李判官

風悲浮雲去

遣興

趙太監時賞第一百一十九

直寶章閣軍器太監督府參議官江西招討副使趙時
賞宗室有志氣首宰旌德以一縣抗虜數有功京師陷
入閩行朝擢知邵武軍以棄城罪去自余開督隨府典

兵數將偏師以當一面神采明雋議論慷慨空坑之敗
走之吳溪尋被執於隆興遇害哀哉

爰傑貴勲業

送殿中楊豐

宗支神堯後

贈李八判

生白羽扇

嚴武公

鬱結回我首

述懷

劉洙第一百二十

帥督府機宜帶行大府寺簿劉洙字淵伯子隣曲

勤王補官予陷淵伯領諸軍還及予歸國淵伯

入府會於汀專將一軍為督帳親衛沉實有謀

允江西忠義皆淵伯所號召晝夜酬應精力

劇乍起空坑之敗不得脫遇害於隆興長子

同日刑次子貢元死空坑亂兵余收其第三幼子亦沒
於廣哀哉

王翰願卜隣

贈韋左丞

稽康不得死

遺典

落月滿屋梁

夢李白

悲風為我起

金華山觀

孫臏第一百二十一

宣教郎帶行監官告院知吉州龍泉縣孫臏子長妹夫
也予引兵出贛其邑人奉臏以邑返正尋為親黨所陷
遇害於隆興哀哉

故人有孫宰

彭衙行

義均骨肉地

餞裴二端公

連為糞土叢

往在

揮手灑衰泪

別建封

文山全集 卷之十四
彭司令震龍第一百二十二

宣教郎帶行大社令知吉州永新縣彭震龍子次妹夫也性跌宕喜功名起兵隨勤王及歸郡邑已陷乃結湖南諸峒豪傑謀興復余出江西即以縣返正虜遣軍攻之其親黨內應被執遇害於郡城哀哉

堂上會親戚

送李校書

可憐馬上郎

白馬

呻吟更流血

北征

干戈浩茫茫

南池

蕭從事燾夫第一百二十三

從事郎蕭燾夫永新人工詩與字從予山中

夫詩尤豪俊亦嘗客吾門燾夫從勤王

司令收復鄉邑規以正道予至興國詣府白事意氣瀟

慨邑城陷兄弟俱不免哀哉

灑翰銀鈎連

陳合遺故宅

翩躚山顛鶴

西閣曝日

慘淡鬪龍蛇

喜晴

及茲歎冥漠

青陽侯

蕭架閣第一百二十四

督幹架閣監軍蕭明哲字元甫吉州貢士性剛毅遇事
有膽氣明于大節予至汀梅來從督府幕及出江西監
贛縣義兵收復萬安縣尋復龍泉行府敗元甫入野陂
連結諸寨拒虜被執死於洪哀哉

諸生舊短褐

橋陵

張目視寇讐

送韋評事

高義終焉在

送王信州

白骨更何憂

得弟觀書

陳督幹第一百二十五

督幹監軍陳子敬
贛人以貨力雄鄉里
舊從予遊行府
至汀子敬招集義兵
置屯皂口以據贛下流
以遏虜船
往來及行府攻贛子敬
行其謀功效甚著
行府敗舉兵
黃塘連結山寨不降
重兵襲潰不聞所終
哀哉

挺身艱難際

送辛評事

虎穴連里閭

課伐木

高天意悽惻

送韋諷

同盡隨丘墟

謁文公上方

陳少卿第一百二十六

帶行太府少卿
福建提刑督府參議官
陳龍復泉州老

儒號清陂先生丙辰登科沈厚朴茂有前輩風流平生
所歷州縣皆以清儉著名余開府南劍辟入幕老成重
一府尋遣往漳潮計事行府自江南再入廣先生聚兵
循梅來會後分司潮陽應接諸路四方豪傑翕然響應
積糧治兵行府由是趨潮陽及移屯爲虜所追襲先生
遂不免時年七十三哀哉

卿月昇金掌

江陵送高大銜

老氣橫九州

送韋評事

前輩復誰紀

李公遠

吾道長悠悠

發秦州

鄒處置第一百二十七

兵部侍郎江東西處置副使督府參贊軍事鄒鳳字鳳

叔吉水人慷慨有大志以豪俠行臺郡間從予勤王補
武資至將軍景炎換文以寺丞領江西招諭副使聚兵
寧都氣勢甚盛寧都被執變姓名爲卜者虜不知其爲
招諭使也入贛城得脫尋聚兵永豐興國間行府奏授
江西安撫副使統兵數萬攻興國縣尋會行府至縣返
正別軍復永豐進授江東西處置副使屯兵永豐境上
以烏合一日而潰行府失助於是有空坑之敗哀哉

東郊暗長戰

吳侍御江上宅

死地脫斯須

將適江陵

庾公興不淺

張九齡

居然屈壯圖

別蘇溪

行府再入廣奏以公充都督府分司置司永豐興國間
接應江淮虜自隆興遣大兵攻襲公萬死一生備經艱
難竟得脫引江西兵入廣會行府於潮陽及移屯公爲
殿事出不虞虜至麾下火急自剄扶入南嶺踰十日死
是行公所將皆江西頭目以取行府爲名使行府入江
西十萬衆立辦天之未啟中興也柰何公有子甚俊先
卒家人散失無餘公嘗謂予欲立富田鄒氏子爲嗣不
果至是絕哀哉

方當用節鉞

相中允

不返舊征魂

東樓

淒涼餘部曲

送郭中丞

發聲爲爾吞

別李義

劉監簿第一百二十九

宣教郎帶行軍器監簿督府機宜劉子俊字民章吾鄉
之傑也嘗領漕貢余開督興國民章來計事行府敗民
章收散兵於河源接應諸郡縣尋引軍入廣道遇虜潰
亡未幾再招集與鄒處置同詣行府會於潮陽越二十
日而行府敗民章被執莫知所終哀哉

艱難奮長戰

潼關吏

高義薄行雲

畫街行

死為殊方鬼

客堂

三夜頻夢君

夢李白

劉監簿第一百三十

秀氣衝星斗

題李八丈

壯筆過飛泉

李十五丈

舊遊易磨滅

汝陽王進

魂傷山寂然
妻子入蜀

蕭資第一百三十一

閣門路鈴蕭資本書吏也小年給使令稍長通文墨圓
機善處事性和厚上下信愛予家先避地入廣資於患
難中扶持盡力及行府江西之敗衛護大夫人全督府
印有功後在兵間調和諸將應府中碎務皆其領攝腹
心之良也潮陽移屯道遇虜資以病體被害哀哉

主當風雲會

病栢

謝爾從者勞

通典

感恩義不小

送盧侍郎

魂獨委蓬蒿

送王休

杜大卿許第一百三十二

文山全集 卷之四
司農卿廣東提舉招討副使督府謀官杜澣字貴卿丞
相立齋之姪也性剛猛爲游俠京師予北行澣願從鎮
江之脫澣之力也匍匐淮甸衛護艱虞忠勞備盡嗚呼
可謂義士

昔沒賊中時

送韋許事

中夜間道歸

後出塞

辛苦救衰朽

遭田父泥飲

微爾人盡非

北征

杜大卿澣第一百三十三

澣從予南還佐府南劍尋遣往台温招集兵財福安陷
相失澣趨行朝夕之奉朝命至行府值江西之敗又與
跋涉艱難者年餘及行府移屯潮陽澣護海舟尋趨桂

山與行府遂隔及厓山潰萍并爲焉余至五羊滸來見
病無復人形在虜網羅中無所容力尋聞死焉哀哉

高隨海上查

夜夢

子豈無扁舟

寄薛鄆中

白日照執袂

送樊侍御

埋骨已經秋

破船

徐榛第一百三十四

詩闕

正將徐榛温州人其父官湖北榛往省迷失道歸行府
後生精練以筆扎典機密小心可信予被執榛得脫自
惠州來五羊願從北行扶持患難備殫忠欸道病至豐
城死焉

林檢院琦第一百三十五

宣教郎督機檢院林琦士余屯餘杭時琦結集赭山
忠義捍禦海道得官及南劍開府琦來外有文采內甚
忠實數隨患難勞而不怨及行府潮陽之敗琦不能脫
虜屯惠境逃去尋又被獲虜遇之不以禮至建康病死
虜自謂琦不肯自愛如於沿道浸水務自殘滅之類琦
可謂不降其志者矣哀哉

時危挹佳士

貽柳少府

慘淡隨回鶻

北征

佯狂真可哀

不見

死淚終映睫

李光弼

曾先生第一百三十六

秀峰曾先生鳳子師也太學釋褐累遷監丞會京師亂

走衢衢尋陷及景炎登極衢添倅蕭雷龍首倡返正先
生自衢來劍隨行府之汀丁丑春以梅州添差通判將
行會行府移屯先生挈家避地於汀之鄉落六月以病
死其子三貴自吉來奔喪不能返喪幸其一家歸至瑞
金三貴復病死於道先生妻亦卒惟女在不知所之先
生遭值虜難以清文粹德一不施於世流落以死家乃
俱喪哀哉

江海日淒涼

遣興

賢聖盡蕭索

西閨

西河共風味

衡山縣學

顧步涕橫落

郭代公故宅

鄧禮部第一百三十七

光薦字中甫予郡人自虜度嶺及廣陷避地深山適強
寇至妻子兒女等匿暗室寇無所睹焚其居十二口同
時死中甫隨駕至厓山除禮部侍郎已卯春除學士院
權直未數日虜至厓山潰中甫赴海虜舟拔出之張元
帥待以客禮與余俱出嶺別於建康嗚呼中甫禍難之
慘不減予而獨免北行幸而脫歸為管寧為陶潛不亦
善乎

南宮無故人

才名三十年

問鄭景文

江城秋日落

贈侍郎四舅

此別意蒼然

送韋雲託

家樞密鉉翁第一百三十八

則堂先生家鉉翁蜀名家有學問舉動必以禮朝中老
成典刑也當國都不守先生簽書樞密見虜持正議左
丞相吳堅右丞相賈餘慶以省札遍告天下令以城歸
附先生不押字虜自省中脅以無禮公不爲動竟末如
之何後以祈請使爲名群詣北庭旣至上書申祈請之
議忤北庭意留燕邸已而移漁陽又移河間如我朝羈
置持官給飲食而已余過河間得一二相見先生風采
非復宿昔而忠貞儼然使人望而知敬嗚呼其可謂正
人矣

出處同世網

鄭公慶

高誼邁等倫

別蔡著作

異方驚會面

送韋別駕

慰此真良臣

寄唐使君

墳墓第一百三十九

予甲戌春自衡陽憲節歸赴贛州省拜墳墓及乙亥五月奔祖母喪至門以起復六月望日出從戎事與宗族

鄉黨未訣云

別離已五年

贈蘇四

不及祖父塋

後園山脚

霜露晚凄凄

出郭

痛哭松風迴

北征

宗族第一百四十

西江接錦城

送李肅

山陰一茅宇

遣興

宗族忍相遺

送崔都水

乾坤此深阻

宿清溪驛

母第一百四十一

先母齊魏國大夫人蓋自虜難後弟璧奉侍赴惠州弟
璋從焉已而之廣之循之梅余來梅州母子兄弟始相
見既而魚軒出江西尋復入廣夫人遊二子間無適無
莫雖兵革紛擾處之怡然戊寅行府駐船澳弟璧仍知
惠州弟璋復在侍夫人藥八月兩國之命下時已得疾
九月七日寅時薨逝弟璧卜地於惠循之深山間不肖
孤已矣未有返葬夫人期不知二弟何時畢此大事身
陷萬里縲絏中歲時南望嗚咽云

何時太夫人

送李校書

上天回哀眷

大雨

墓久孤兔隣

汝陽王璣

嗚呼淚如霰

白馬

舅一百四十二

予以楚囚過西昌聞舅家杙程自是南望孤雲每念我

母不勝渭陽之情

萱草秋已死

從孫濟

歲暮有嚴霜

北游

落日渭陽情

送翁統軍

涕淚濺我裳

貼華陽李少府

妻第一百四十二

丁丑八月十七日空坑之敗夫人歐陽氏女柳娘環娘

子佛生環之生母顏佛之生母黃並陷失尋聞自隆興

北行惟佛生已死人世禍難有如此者哀哉

結髮為妻子 新婚別

生離與死別 別賀蘭錡

二女第一百四十四

床前兩小女 北征

所愧為人父 赴奉先縣

次子第一百四十五

渥洼驥驥兒 送李校書

別來忽三載 四松

妻子第一百四十六

妻子隔絕久 述懷

倉皇避亂兵 破船

回首淚縱橫 示宗文宗武

各在天一涯 送高書記

風物長年悲 送楊監入蜀

衆中見毛骨 送魏大丈

殘害為異物 北征

飄飄若埃塵 寄薛郎中

漠漠世間黑

贈蜀僧

性命由他人

懷鄭司戶

妻子第一百四十七

世亂遭飄蕩

羌村

飛簷共徘徊

昔遊

十口隔風雪

赴奉先縣

反畏消息來

述懷

長妹第一百四十八

余長妹適孫氏不幸孫氏偪以覆家沒入燕妹奉孫氏生

母携子肖翁約翁及一女零丁孤苦客食萬里妹雖患

難中侍養撫教各盡其所可謂賢矣哀哉

近聞韋氏妹

元日

零落依草木

佳人

深負鵲鴒詩

得舍弟消息

臨風欲痛哭

閬州東樓

長子第一百四十九

予二子長曰道生姿性可教不幸亂離隨家飄泊空坑
之敗能脫身自全鍾愛於大夫人以疾後大夫人六十
日死於惠陽郡治中生十三年矣哀哉

大兒聰明到

劉少府山水障

青歲已摧頽

昔道

回風吹獨樹

樊侍御

吾寧舍一哀

赴奉先縣

二女第一百五十

予六女長定娘次柳娘次環娘次監娘次奉娘次壽娘
丙子定娘壽娘以病死於河源之三角丁丑柳娘環娘
陷惟監娘奉娘得存戊寅潮陽之敗復死亂兵中哀哉

癡女飢咬我

彭衙行

鬱沒一悲魂

遣懷

不得收骨肉

佳人

痛哭蒼烟根

送樊侍御

弟第一百五十一

余二弟長璧次璋璋自船澳奉母喪趨惠州別壁來五
羊別自是骨肉因緣墮寥廓矣哀哉

兄弟分離苦

送弟頰

淒涼憶去年

倚杖

何以有羽翼

夢李白

飛去墮爾前

彭衙行

弟第一百五十二

棣華晴雨好

和宋太少府

風急手足寒

水會渡

百戰今誰在

憶弟

羈棲見汝難

寄弟

弟第一百五十三

沙晚鵲鴿寒

寄弟豐

風吹紫荆樹

得弟消息

忍淚獨含情

郭中丞

江湖春欲暮

宴胡生

弟第一百五十四

不見江東弟

元日示宗武

急難心惘然

羨鵠

念君經世亂

送班司馬入京

卧病海雲邊

所思

次妹第一百五十五

予次妹自來新歸寧不與彭氏之難亂離中隨母兩國

夫人上下自船澳奉喪趨惠陽兄妹不復見矣哀哉

天際傷愁別

出郊

江山憔悴人

送孟介曹

團圓思弟妹

又示兩兒

傳語故鄉春

贈別何邕

思故鄉第一百五十六

自一百五十六至一百六十二共七首皆思故鄉懷故
山之情余始創文山其間水石竹木蕭然有輞川盤谷
之趣蓋將終焉承平時鄉曲賓朋日夕宴聚樂以忘憂
真人世之清福今思之非惟平生故人半爲塵土而故
鄉萬里并隔世外惟死則魂識歸吾故鄉耳哀哉

天地西江遠

送崔侍郞

無家問死生

憶舍弟

涼風起天末

憶李白

萬里故鄉情

江樓宴

第一百五十七

江漢故人少 贈弟贊善

東西消息稀 憶弟

異花開絕域 遊向將軍山林

野風吹征衣 別贊善

第一百五十八

老夫悲華年 聽楊氏歌

天涯故人少 送弟

每望東南雲 遺興

决背入飛鳥 望岳

第一百五十九

人生無家別 無家別

親故傷老醜 述懷

剪紙招我魂 彭衙行

何時一樽酒 憶李白

第一百六十

春水滿南國 遺寓

慘淡故園烟 陳拾遺

三年門巷空

遺興

未為隣里憐

草

第一百六十一

迢迢萬里餘

前出塞

絕域誰慰懷

贈李五丈

我圃日蒼翠

雨

回首望兩涯

柴門

第一百六十二

春日漲雲岑

過津口

故園當北斗

月

窈窕桃李花

喜晴

紛披為誰秀

九月

第一百六十三

自一百六十三至二百九十二共二十九首雜然寫其本心

陶潛避俗翁

遣興

龐公竟獨往

雨

明明君臣契

牽牛織女

牢落吾安放

鄭公虔

第一百六十四

吳楚東南坼

登岳陽樓

風雲地一隅

地隔

蹉跎暮容色

重過何氏

不敢恨危途

北風

第一百六十五

風煙渺吳蜀

柴門

雲帆轉遼海

後出塞

喪亂紛嗷嗷

遺寓

尚愧微軀在

別與屬二奉禮

第一百六十六

驚風翻河漢

有懷

鷓首麗泥塗

將適江陵

吾衰將焉託

遺懷

愁絕付摧枯

北征

第一百六十七

陰風千里來

吳侍御江上宅

驚浪滿吳楚

雨

世事兩茫茫

贈衛處士

飄泊欲誰訴

又雨

第一百六十八

平生方寸心

舟中苦熱

誓開玄冥北

後出塞

歲暮日月疾

寫懷

我嘆黑頭白

醉薛判官

第一百六十九

今吾抱何恨

贈別

恨無匡復姿

送樊侍郎

含笑看吳鉤

後出塞

回首蛟龍池

詠懷

第一百七十

天長眺東南

鄭公虔

衰謝多酸辛

汝陽王璠

丈夫誓許國

前出塞

直筆在史臣

李公光弼

第一百七十一

天衢陰崢嶸

赴奉先縣

歲寒心匪他

送嚴使君

平生獨往願

立秋後題

零落首陽阿

過宋之問舊莊

第一百七十二

濟時肯殺身

寄唐使君

慘淡苦士志

送李大夫

百年能幾何

別唐誠

終古立忠義

陳拾遺故宅

第一百七十三

絕域三冬暮

送七十舅

垂老見飄零

送李大夫

文山全集
卷之十四
林氣森噴薄

過郭代公故宅

意鍾老栢青

送程錄事還鄉

第一百七十四

仰看八尺軀

別張建封

不要懸黃金

蘇公源明

青青歲寒栢

枯拔

乃知君子心

張九齡

第一百七十五

小人困馳驟

九口

後生血氣豪

遣懷

世事固堪論

園官送美

我何隨爾曹

飛仙閣

第一百七十六

天地日蛙蠅

張九齡

勞生苦柰何

餞嘉州程都督

聊欲從此逝

送樊侍御

人少豺虎多

別唐誠

第一百七十七

男兒生世間

後出塞

居然成濩落

赴奉先縣

鸞鳳有鍛翮

寄唐使君

虹蜺就掌握

揚旗

第一百七十八

鸞鳳不相待

曠日小園

白魚困密網

過津口

但訝鹿皮翁

遣興

冥冥任所往

蘇少保

第一百七十九

威鳳高其翔

尋崔叟

老鶴萬里心

遣興

脫略誰能馴

薛少保

兀兀遂至今

赴奉先縣

第一百八十

天寒霜雪繁

赤谷

蕭蕭北風勁

羌村

高鳥黃雲暮

送殷參軍

斗上挾孤影

義鶻

第一百八十一

乾坤沸嗷嗷

送王殊

名繫朱鳥影

張九齡

寥落寸心違

送何侍

斯文亦吾病

早發

第一百八十二

儒冠多誤身

贈韋右丞

識字用心苦

阮隱君

斯文憂患餘

宿鑿石南

鬱鬱流年度

雨

第一百八十三

名不慎出處

自施州歸

志士懷感傷

贈李四丈

猶殘數行淚 登牛首山

引古惜興亡 壯遊

第一百八十四

讀書破萬卷 贈韋右丞

許身亦何愚 赴奉先縣

赤驥頓長纓 述古

健兒勝腐儒 草堂

第一百八十五

蕭條四海內 別唐誠

慷慨有餘悲 水檻

路逢相識人 前出塞

開懷無愧辭 詠懷

第一百八十六

高歌激宇宙 衡山縣學

歲晚寸心違 贈韋贊善

忠貞負冤恨 李公邕

姦雄多是非 詠懷

第一百八十七

丈夫四方志

前出塞

喪亂飽經過

寓目

清心聽鳴鏑

聽計十誦詩

衰老強高歌

別唐識

第一百八十八

茫然阮籍途

早發射洪

益歎身世拙

北征

零落蛟龍匣

李公光弼

開視化為血

客從

第一百八十九

天地有逆順

崔少府

惘然難久留

發秦州

當歌欲一放

尋崔載

河漢聲西流

登慈恩塔

第一百九十

萬古一死生

詠懷

誰是長年者

玉華宮

我何良嘆嗟

塩井

短褐即長夜

遣興

第一百九十一

高官何足論

註人

寂寞身後事

夢李白

物理固自然

塩井

願聞第一義

謁文公上方

歎世道第一百九十二

自一百九十二起至二百泛然為世道感歎

古來遭喪亂

西閣滕日

丈夫多英雄

牽牛織女

悠悠委薄俗

入衡州

豈非吾道東

贈蘇四

第一百九十三

六山全集
卷之十四
五十二
蝮蛇暮偃蹇

簡崔評事

猛虎憑其威

遺興

真宰意茫茫

遺興

六合人煙稀

北風

第一百九十四

黎民困逆節

登襄上堂

殘孽駐艱虞

過南岳

孰云網恢恢

夢李白

自及梟獍徒

草堂

第一百九十五

眼中萬少年

別張建封

得志行所為

詠懷

白馬蹴微雪

遺興

追隨燕薊兒

王公思禮

第一百九十六

客從何鄉來

病栢

挾矢射漢月

留花門

殺身傍權要 三歌

門戶有旌節 遺興

第一百九十七

關河霜雪清 送遠

故人亦流落 送裴五赴

夷歌奉玉盤 楊六判官

悲君隨燕雀 贈何子

第一百九十八

漁陽豪俠地 後出塞

北里富熏天 遺興

快馬金纏轡 送從弟亞

但遇新少年 遺懷

第一百九十九

南北逃世難 逃難

始聞蕃漢殊 草堂

天下今一家 鹿須山

中原有驅除 留花門

第二百

茫茫天造間 宿花石戍

高岸尚為谷 水檻

百川日東流 別贊上人

勢閱人代速 觀山川水漲

宋丞相文山先生全集卷之十四 終

文丞相傳

廬陵劉岳申諫

文丞相天祥字履善吉州廬陵人也父儀鄉稱長者大父時用夢兒乘紫雲下已復上而承相生故名雲孫字天祥英姿雋爽目光如電稍長遊鄉校見歐陽文忠公楊忠襄公胡忠簡公周文忠公楊文節公祠像慨然曰沒不俎豆其間非夫也寶祐乙卯年二十以字貢廷對真第五理宗親擢第一尋丁父憂服除授承事郎僉書寧海軍節度判官廳公事時江上有警吳潛再相內都知董宋臣主遷幸議天祥上書乞斬董宋臣以一人心安社稷請效方鎮建守就團結抽兵破資格用人書奏不報自免歸以前職改

鎮南軍不拜乞祠得主管建昌軍仙都觀除秘書省正字
兼景獻府教授進校書郎著作郎兼權刑部郎官董宋臣
復爲都知上疏極論不報出守瑞州召爲禮部郎官尋除
江西提刑伯祖母梁夫人卒夫人其父本生母也卽日解
官終喪除尚左郎官兼學士院權直兼國史院編脩官實
錄院檢討官臺臣奏免尋除福建提刑臺臣復奏寢改知
寧國府民歌舞之爲立生祠除軍器監兼右司尋兼崇政
殿說書兼學士院權直兼玉牒所檢討官平章賈似道乞
致仕有嬰君意學士院降詔裁責以義賈意不滿除秘書
監臺臣迎合賈意奏免除湖南運判臺臣復奏寢始關文

出於其鄉窮山水之樂除湖南提刑平邵永巨寇道路肅
清見故相江公萬里於長沙公曰吾老矣觀天時人事必
當有變世道之責其在君乎君必勉之是冬乞便郡養親
移知贛州明年爲德祐元年乙亥至元十二年也正月朔
牒報元帥渡江詔諸路勤王奉詔起兵二月似道魯港師
潰除右文殿脩撰樞密副都承旨江西安撫副使兼知贛
州尋兼江西提刑進集英殿脩撰江西安撫使加權兵部
侍郎丁祖母劉氏夫人憂塋夫人而起復命下累疏乞終
制不許仍趣兵移洪初左相王爚主天祥遷擢屢趣天祥
入衛與右相陳宜中不合爚引嫌去國京學生上書訟宜

中沮天祥事宜中出關留夢炎代相夢炎素厚宜中又黨
江西制置黃萬石至是夢炎奏萬石入衛以天祥移屯於
洪經畧九江萬石陰與呂師夔通自洪退屯置司撫州有
旨趣天祥入衛天祥以兵二萬至衢州除權工部尚書兼
都督府叅贊軍事至臨安兩月累奏乞終喪又奏古有墨
衰從戎無墨衰登要津者乞仍樞密副都承旨江西安撫
使領兵國門皆不許除浙西江東制置使兼江西安撫大
使兼知平江府留不遣天祥請分東南爲四鎮而以都督
統御其中時朝廷方遣呂師孟奉使師孟偃蹇傲朝廷天
祥乞斬師孟爨鼓不報常州已急始遣天祥就戍尋除端

明殿學士宜中遣張全將淮兵二千援常州天祥遣朱華
將廣贛兵三千從之全自提兵設伏於廣橋麻士龍死之
而全不援元帥溥華軍廣軍多死於水口溥贛軍尹玉獨
當其鋒曾全等皆遁張全擁軍隔河不一矢華軍渡水
者爭挽全軍船全令諸軍盡斷其指以死全宵遁尹
玉孤軍五百人皆殊死戰王死之及明得脫者四人無一
人降者天祥欲斬張全督府竟宥之獨斬曾全以徇奏贈
尹玉團練使立廟死所官其二子常州破攻獨松關急憂
災宜中陳文龍議棄平江趨天祥移守餘杭天祥未決兩
府劄再至遣環衛王邦傑留平江天祥去平江三日通判

王舉之與邦傑開門迎降天祥進資政殿學士湖西江東
制置大使兼江西安撫大使置屯餘杭守獨松關未幾夢
災遁明年正月除知臨安府不拜以輕兵赴闕始從天祥
初議送吉王信王闔廣大臣日請三宮渡江大皇太后不
允天祥諳以福王或沂王判臨安以繫人望身爲少尹以
輔之有急密移三宮當以死衛社稷議不合少保張世傑
宿重兵於六和塔又請自將京師義士二十萬與城內外
軍數萬人背城借一以戰爲守世傑不許十八日伯顏至
高亭山距臨安三十里宜中遣使絡繹講解伯顏邀宜中
相見宜中許之而遁明日世傑亦遁除天祥樞密使又除

右丞相兼樞密不拜使者至上下震恐莫知所爲有旨令
天祥詣軍前遂以資政殿學士行因說伯顏曰宋承帝王
正統非遼金比今北朝將欲爲與國乎將毀其宗社乎若
以爲與國則宜退兵平江或嘉興然後議歲幣與金帛犒
師天祥躬督所議悉輸軍前北朝完師以還此爲不戰而
全勝策之上也若欲毀其宗社則兩淮兩浙閩廣尚多未
下窮兵取之利鈍未可知假能盡取豪傑並起兵連禍結
必自此始伯顏初以危言折之天祥謂宋狀元宰相所欠
一死報國耳宋存與存宋亡與亡刀鋸在前鼎鑊在後非
所懼也何怖我爲伯顏改容因謝曰前日已遣程鵬飛詣

宋太皇太后簾前親聽處分候鵬飛至卽與丞相定議明日左丞相吳堅右丞相賈餘慶同知樞密院事謝堂僉書樞密院事家鉉翁同僉書樞密院事劉岳與呂師孟奉降表至伯顏引天祥同坐堅等各就車歸獨留天祥不遣天祥大罵賈餘慶賣國且責伯顏失信呂文煥從旁慰解之天祥斥言叛逆遺孽當用春秋誅亂賊法文煥語丞相何故以逆賊見罵天祥曰國家不幸至今日汝爲罪魁非逆賊而何三尺童子猶斥罵汝獨我乎文煥曰守襄陽七年不救是以至此天祥曰呂氏一門父子兄弟受國厚恩不幸勢窮援絕以死報國可也豈有降賊以自愛身惜妻子

壞家聲今汝合族爲逆矣尚何言文煥慚恚師孟忿怒云
丞相今日何不殺師孟天祥謂汝叔姪賣降恨朝廷失刑
不族滅汝汝今日能殺我得爲大宋忠臣足矣豈懼死哉
師孟語塞伯顏聞之吐舌云男子男子然自是益留之不
復遣還矣賈餘慶歸令學士院詔天下州郡歸附放還天
祥所部勤王義士西歸其渡浙歸閩者惟方興朱華鄒瀛
張抃數人耳二月八日伯顏趣天祥隨祈請使吳堅賈餘
慶北行天台杜滸從至京口留十日杜滸與余元慶定計
謀趨真州不可得舟元慶遇故舊許以白金千兩求之其
人云吾爲大宋脫一丞相事成豈止白金千兩哉竟得舟

二月二十九日也是午促過瓜洲賈餘慶等已渡天祥辭以明日同吳丞相渡以是夕逝幸得至真州城下三月朔日也守將苗再成迎宿時真州不知京城消息已數月聞天祥至無不感憤流涕者諸將皆謂兩淮兵力足以興復恨李制置與淮西夏老不能合從得丞相通兩闔脈絡不出一尺連兵大舉江南可傳檄定也天祥問再成計將安出再成爲言灣頭楊子橋守者皆沿江脆兵今以通泰軍攻灣頭以高郵寶應淮安軍攻楊子橋以揚州兵向瓜洲再成與刺史趙孟綿以舟師直搗鎮江同日大舉彼軍勢不能相救護以灣頭楊子橋合兵攻瓜洲之三面再成自

江中一面薄之雖有智者不能爲之謀矣然後以淮東軍入京口淮西軍入金陵兩浙無出路其大帥可生致也天祥喜甚卽爲書李庭芝夏貴庭芝得書反疑丞相無得脫理罪真州不當納之遣官諭再成亟殺天祥以自白再成不忍殺三日給天祥出視城壕使王陸二都統導之出示以制司文書謂丞相爲說城天祥方驚嘆而兩都統鞭馬入城門已閉矣杜滸赴城壕欲死有張徐二路分自言苗安撫遣送丞相惟丞相所向天祥云今惟往揚州夏老不相識淮西又無歸路委命於天惟往揚州久之有弓刀五十人至張徐各就騎以二騎從天祥天祥與杜滸連騎行

數里張徐請下馬天祥既下云且行既行云且坐坐又立
談張徐云制使欲殺丞相安撫不忍故遣某二人送行今
丞相安往天祥云只往揚州張徐云揚州欲殺丞相不可
往天祥云無可奈何今只欲見李制置自白此心庶幾見
信共圖恢復否則從通州遵海歸行朝張徐云安撫已具
船令從丞相江行歸南歸北皆可天祥云如此則安撫亦
疑我矣張徐方吐實云安撫猶在疑信之間令某二人便
宜從事某見丞相忠義如此何敢加害既決欲往揚州當
相送是日暮張徐先辭去留二十人從行頃之二十人亦
去明日至揚州杜濟謂制使先不相容必且死於城門不

如且避哨以夜趨高郵至通州渡海歸江南見二王與徒
死城下萬萬不侔金應又謂出門卽有哨此去通州尚五
百里何由而達與其死於彼不如死揚州且猶冀未必死
天祥計未決而從行者四人已負腰金逝矣不得已去揚
州城下避哨土圍糞穢中忽數千騎過其後至賈家庄已
兩日不得食又迫巡徼者夜迷失道幸得至高郵而制司
命下關防說城愈急遂不敢入城過城子河至海陵過海
安如臯舟與追騎常相距危不免者數矣至通州適牒報
鎮江大索文丞相十日且以三千騎追亾於澣浦始釋制
司前疑得海舟渡揚子江入蘇州洋展轉四明天台以四

月八日至温州益王建大元帥府於福州天祥上書勸進
始以五月朔卽位福安改元景炎以觀文殿學士召天祥
二十六日行至都門除右丞相時樞密使陳宜中副使張
世傑用事丞相具員天祥辭不拜以樞密使同都督諸路
軍馬發行都出南劍號召天下十月趨汀州遣督叅趙時
賞督咨趙孟滌復寧都督贊吳浚復雩都天祥移屯漳州
龍巖縣未幾浚斲唆都命來招降遂殺浚以定衆志時唆
都與左丞阿剌罕叅政董某旣入閩李珣王積翁以福建
宣慰招撫使各致書天祥天祥復書候見老母卽從先帝
地下無可言者明年三月入梅州始與母弟妻子相見進

階銀青光祿大夫四月斬統制錢漢英王福引兵自揚州
出江西入會昌戰雩都大捷因開府興國督謀張抃監軍
趙時賞孟滌盛兵薄贛城下招諭使鄒鳳率贛諸縣兵擣
永豐吉水招撫副使黎貴達率吉諸縣兵復太和臨洪諸
郡豪傑皆納款淮西義士劉源以兵復黃州復壽昌軍潭
州趙璠張琥撫州何時皆起義兵分寧武寧皆遣使詣軍
門受約束福建斬僞天子黃從傳首至督府軍勢大振貴
達以正軍千人民兵數千次太和鍾步張抃趙時賞趙孟
滌率民兵數萬逼贛遇騎卒先後衝之皆潰自相蹂藉死
孟滌收殘兵保雩都督府聞鄒鳳聚兵數萬於永豐乃引

兵就之會瀨兵亦潰元帥李恒以大軍乘其弊追及於廬
陵東固之方石嶺都統制鞏信駐軍嶺上力戰箭被體不
動猶手殺數十人乃自投崖谷死大軍追至空坑同督府
兵潰天祥幾被執值山逕險隘有大石忽墜塞其路乃得
脫去既而妻妾子女皆陷惟母曾夫人子道生從天祥奔
汀州趙時賞吳文炳林棟劉洙皆就執張扑劉欽爲亂兵
所殺天祥趨循州其冬塔朮呂師夔李恒以步卒入嶺峻
都蒲壽庚劉深以舟師下海皆會廣州天祥駐循之南嶺
黎貴達有異志伏誅明年二月出海豐三月屯麗江湏命
弟壁攻惠州五月端宗凶問至衛王改元祥與天祥奉表

起居自劾罔功有詔獎諭陸秀夫當筆其略曰方敵氛之
正惡鞠旅勤王及皇路之已傾捐軀徇國脫危機於虎口
涉遠道於鯨波雖成敗利鈍逆睹之未能而險阻艱難備
嘗之已熟如金百鍊而益勁如水萬折而必東天祥乞移
軍入朝不許又欲入廣州時廣州新復憚天祥威重佯遣
舟來迎而中道去之遂不果入六月祥與舟自礪州回駐
崖山督府累請入覲世傑日以迎候宜中還朝爲辭諸大
將多忌天祥又位樞密使出已上皆不便其入加天祥少
保信國公母曾封齊魏國夫人同督府官屬各轉五資以
金三百兩犒其軍天祥移書秀夫天子幼冲宰相遁荒制

訓勅令出諸公口柰何不恤國事以游辭相距耶秀夫太
息而已時督府全軍疾疫齊魏國夫人子道生相繼卒遣
使宣祭起復初陳懿兄弟皆爲劇盜世傑招之叛附不常
潮人苦之潮士民請移行府于潮十一月進潮陽縣戮懿
黨劉興時張弘範爲都元帥以大軍自明秀下海以步卒
自漳泉入潮天祥以聞行朝十二月十五日移屯趨海豐
入南嶺鄒鳳劉子浚以民兵數千至自江西時弘範步騎
尚隔海港陳懿爲迎導具海舟以濟弘範旣濟使其弟弘
正以輕兵直指督帳二十日午天祥方飯客五坡嶺步騎
奄至天祥度不得脫卽取懷中腦子盡服之衆擁天祥上

馬天祥急索水飲冀速得死已乃暴下竟不死諸軍皆潰
天祥見弘正於和平大罵求死越七日至潮陽踴躍請劍
就死弘範必欲以禮見議相見禮天祥曰吾不能跪吾嘗
見伯顏阿木惟長揖耳或曰柰何不拜天祥曰吾能死不
能拜弘範亦不能強遂以長揖相見明年正月二日弘範
驅天祥登海艘十日至崖山弘範索天祥爲書招世傑天
祥曰已不能救父母又教人叛父母可乎愈益急索則書
過零丁洋一詩示之詩末云人生自古誰無死留取丹心
照汗青弘範笑而置之自此守護益謹然禮貌益隆二月
六日崖山破先是陸秀夫在行朝以樞密兼宰相至是請

於太妃曰臨安母子已被辱殿下不宜再辱言訖卽沉其妻孥冠裳抱祥興赴海太妃從之宮人已下皆從太妃官屬將士爭蹈海死者數萬人十四日弘範置酒大會諸將因舉酒從容謂天祥曰國亡矣忠孝之事盡矣丞相改心易慮以事大宋者事大元大元賢相非丞相而誰天祥流涕曰國亡不能救爲人臣者死有餘罪况敢逃其死而二其心乎弘範又謂國亡矣卽死誰復書之天祥謂商亡而夷齊不食周粟亦自盡其心耳豈論書與不書弘範爲改容副元帥龐鈔兒赤起行酒天祥不爲禮龐鈔兒赤怒罵之天祥亦大罵請速死弘範遣使具奏天祥不屈與所以

不殺狀世祖皇帝命護送天祥京師弘範遣督鎮撫石嵩
護行且以崖山所得宋禮部郎官鄧光薦與俱二十二日
發廣州至南安始繫頸繫足以防江西之奪者明日天祥
卽絕粒不食計日可首丘廬陵乃爲文祭墓爲詩別諸友
遣人馳歸約日復命廬陵城下卽瞑目長逝乃水盛風駛
前一日過廬陵至豐城始知所遣人竟不得往於是不食
已八日念不得死廬陵而委命荒江志節不白始從容就
義強復飲食十二日至建康囚驛中鄧光薦寓天慶觀八
月二十四日天祥北行十月至燕館所供帳如上賓館人
云博羅丞相命也天祥義不寢處坐達旦四日張弘範至

具言不屈狀五日送兵馬司械繫空宅中十餘日解手縛
又十餘日得疾十二月二日去械猶繫頸五日赴樞密院
九日見博羅丞相張平章命之跪天祥曰南人不能跪左
右強之終不可問有何言天祥曰自古有興有廢帝王將
相滅亾誅戮何代無之盡忠於宋所以至此今日不過死
耳有何言又問天祥曰爲宋丞相宋亾義當死爲北朝所
獲法當死何言博羅問自古常有宰相以宗廟城郭與人
又遁逝去者否天祥曰爲宰相而奉國以與人者賣國之
臣也賣國者必不去去者必非賣國之臣前除宰相不拜
奉使伯顏軍前尋被拘留不幸有賊臣賣國國亾當死但

以度宗皇帝二子在浙東老母在廣故去之耳問德祐非君乎曰吾君也曰葉嗣君而立二王果忠臣乎曰德祐不幸失國當此之時社稷爲重君爲輕立君者所以爲宗廟社稷計故爲忠臣從懷愍而北者非忠從元帝爲忠從徽欽而北者非忠從高宗爲忠博羅不能詰有問晉元帝宋高宗有所受命二王何所受命且不正是篡也曰景炎乃度宗皇帝長子德祐親兄不可謂不正卽位於德祐去位之後不可謂篡陳丞相以大皇太后命奉二王出宮不可謂無所受命博羅謂汝爲相能挾三宮以往可以爲忠不能則與伯顏丞相一戰決勝負可以爲忠天祥曰此可以

責陳丞相不可以責我此時未當國故也又問汝立二
王竟成何事曰立君以存宗社臣子之責若夫成功則天
也又曰既知其不可何必爲曰父母有疾雖不可爲無不
用醫藥之理不用醫藥者非人子也天祥今日至此惟有
死不在多言汝所言都不是博羅怒曰汝欲死何得快死
耶死汝必不可得快天祥云得死卽快何不快爲博羅呼
引去自是囚兵馬司者四年其爲詩有指南前錄三卷後
錄五卷集杜二百首皆有自序天下誦之其翰墨滿燕市
又時時爲吏士講前史忠義聞者傾動嘗裹所脫爪齒鬚
髮寄弟璧始終未嘗一食官飯上自開平還大興問南北

宰相訛賢羣臣皆曰北人無如耶律某南人無如文天祥
上將付以大任王積翁謝昌元相率以書諭上意天祥復
書云諸君義同鮑叔而天祥事異管仲管仲不死而功名
顯於天下天祥不死而盡棄其平生遺臭於萬年將焉用
之積翁知不能屈猶奏請釋天祥而禮之以爲事君者勸
上語積翁命兵馬司好與飲食天祥使人語積翁吾義不
食官飯數年矣今一旦飯於官吾且不食積翁始不敢言
會麥木丁叅知政事麥木丁者嘗開省江西親見天祥出
師震動每倡言不如殺之便自是上與宰相每欲釋之輒
不果至元壬午十二月八日召天祥至殿中天祥長揖不

拜極言宋無不道之君無可弔之民不幸母老子弱權臣
誤國用舍失宜北朝用其叛將叛臣入其國都毀其宗社
天祥相宋於再造之時宋亾天祥當速死不當久生上使
諭之曰汝以事宋考事我卽以汝爲中書宰相天祥對曰
天祥爲宋狀元宰相宋亾惟可死不可生又使諭之曰汝
不爲宰相則爲樞密對曰一死之外無可爲者遂命之退
明日有奏天祥不願歸附當如其請賜之死交水丁力贊
其決遂可其奏天祥將出獄卽爲絕筆自贊繫之衣帶間
其詞云孔曰成仁孟云取義惟其義盡所以仁至讀聖賢
書所學何事而今而後庶幾無愧過市場揚揚顏色不變觀

者如堵問市人訖爲南北南面再拜而就死見者聞者無
不流涕是日大風揚沙石晝晦咫尺不辨人城門晝閉籍
兵馬司得天祥所爲詩文上之天祥死時年四十有七矣
南人留燕者悲歌慷慨相應和爲歌更置酒酌丞相相慰
藉更相自賀至有十義士者收葬於都城外初天祥旣第
誓不倚勢近利曰祿賜所入盡以散族姻鄉友之貧者至
是官籍其家蕭然方過尚安時遣人告墓以弟壁之子陞
爲嗣又寄弟詩曰親喪石自盡猶子是吾兒大德中陞奉
母歐陽夫人歸自豐州云

贊曰文丞相以廬陵年少穆陵親擢進士第一卽上書乞

斬董宋臣者至再宋垂亾猶乞斬呂師孟釁鼓此豈希合
苟生者賈似道沮之留憂炎嫉之宜也陳宜中張世傑亦
忌之何也黃萬石嫉之何也李庭芝疑之至欲殺之又何
也或謂使庭芝不疑其異可合事未可知豈所謂天之所
廢不可興者耶方其脫京口走真揚脫真揚走三山出萬
死與潮陽仰藥不死南安絕粒不死燕獄不死何異若將
以有爲者及得死所卒以光明俊偉暴之天下後世殆天
以丞相報宋三百年待士之厚且以昌世教也而或者咎
其踈闊議其無成謬矣夫非諸葛公所謂鞠躬盡瘁死而
後已者乎死之日宋亾七年崖山亾又五年矣